

**समा. 09.20 Hrs**

एह आकाशवाणी जम्मू ऐ, बडलै खबरें च तुंदा सुआगत, पैहले खास-खास खबरें कन्नै कुणाल श्रीवत्स :-

## Headlines

1. जम्मू-कश्मीर विधानसभा दा बजट इजलास अज्ज उपराज्यपाल मनोज सिन्हा हुंदे सम्बोधन कन्नै शुरु होआ रदा ऐ।
2. माली बरे 2026-27 दे बजट पर चर्चा आस्तै जम्मू-कश्मीर सरकार दे मंत्रीमंडल दी अज्ज बैठक लग्गोग।
3. उत्तर-रेलवे 3 ते 4 फरवरी 2026 गी कटरा ते श्रीनगर बश्कार आरक्षित विशेष रेलगड्डियां चलाग- तां जे यात्रियें दी भारी भीड़ गी सुविधाजनक यात्रा मुहैया करोआई जाई सकै।
4. खेड्ड मंत्री सतीश शर्मा होरें आखेया ऐ जे सरकार समूलचे जम्मू-कश्मीर च खेड्डें दे ढांचागत विकास लेई बचनेबज्झी दी ऐ।
5. ते अज्ज बड्डलै जम्मू-कश्मीर दे बारामूला जिले च रिक्टर स्केल पर 4 इशारिया 6 तीव्रता आहले भूंचाल दे झटके महसूस कीते गे।

## JK –Budget Session

जम्मू-कश्मीर विधानसभा दा बजट इजलास हुनै थमां किश चिर मगरा उप-राज्यपाल मनोज सिन्हा हुंदे सम्बोधन कन्नै शुरु होग। एहदे मगरा उप-राज्यपाल हुंदे सम्बोधन पर धन्नवाद प्रस्ताव पर चर्चा होग। इस बजट सत्र च मुखमंत्री उमर अब्दुल्ला होर जिंदे कश खजना मैहकमे दा कम्मकाज बी ऐ- ओह इस सरकार दा दुई बारी सदन च 6 फरवरी गी बजट पेश करगंन। एह सत्र त्रंऊ चरणें च लोआया जाग। कैलेंडर मूजब जम्मू-कश्मीर विधान सभा दा बजट सत्र 4 अप्रैल गी सम्पन्न होग।

<><><><><><>

## Cabinet Meet

जम्मू-कश्मीर काबिना दी बैठक च अज्ज दपैहरी लग्गोग ते एदे च 2026-27 दे बजट थमां पैहले आहली चर्चा होग। 6 फरवरी गी बजट पेश कीता जाग। आकाशवाणी जम्मू संवाददाता दी रिपोर्ट मुजब मुखमंत्री उमर अब्दुल्ला होर इस बैठक दी अध्यक्षता करगंन। एह बैठक उन्दे आधारिक आवास पर लग्गोग। काबीना आस्सेया बजट प्रस्तावें गी मंजूरी दिती जाग।

<><><><><><>

## Budget Reactions (Byte)

खजाना मंत्री निर्मला सीतारमण होरें कल संसद च केन्द्रीय बजट पेश कीता। इस बजट दा जम्मू खिते दे बक्ख-बक्ख जिलें च लोकें सोआगत कीता ऐ। जम्मू-कश्मीर लेई 2026-27 आस्तै 43 जहार 290 करोड़ 29 लक्ख रपे रक्खे गे न- जेड़े जे चालू माली बरे थमां 2 जहार

करोड़ बद्ध न। लोकें इस बजट की लोक आधारित ते करसानें अनुकूल बजट दस्सेया- जेदे राए विकसित भारत 2047 दे लक्ष्य की हासल कीता जाई सकदा ऐ। लोकें सैलसफा आधारित जत्ने ते केंसर दियें दोआइयें दी कीमत की घट्ट करने-मोबाईल फोन सस्ते होने ते आयकर दी रिटर्न भरने दी समें-सीमा अगगे बढ़ाने आहले तरीकाकारें दा सोआगत कीता ऐ। कारीगरें ते कारोबारियें बी इस बजट दा सोआगत कीता। इस बजट च खास तौर पर ध्यान दस्तकारी ते हत्थ-खड्डी पर दिता गया ऐ तां जे मुकामी अर्थबवस्था की बढ़ावा थोई सकें।

<><><><><><>

## **Tourism Budget**

इस्सै दौरान एसोचेम जम्मू-कश्मीर काउंसल दे इक मिम्बर नै जम्मू-कश्मीर लेई बजट आवंटन बारे विश्वास ते मेद जाहिर करदे होई आखेया जे सैलसफा सैक्टर की बड़ा मता बढ़ावा थोआ ऐ, पर इस बक्खी ध्यान अखीरले मील तगर पुज्जने पर होना लोड़चदा ऐ- खास करियें जम्मू खिते दे उनें इलाकें च जित्थे सैलानी थाहरें होने दे बावजूद पैहले बुनियादी सिड़क पुज्ज दी कमी ही।

<><><><><><>

## **Special Trains**

खराब मौसम ते सिड़कें दे कन्नो-कन्नी ब्हाई डोआरियें च रुकावट औहने करी श्री माता वैष्णो देवी कटरा ते श्रीनगर बश्कार यात्रियें दे भारी रश दे चलदे उत्तर रेलवे नै आरक्षित विशेष रेलगड्डियें की चलाने दी मंजूरी देई दिती ऐ। साहड़े जिला संवाददाता नै जानकारी दिती ऐ जे

चार विशेष रेलगड्डियां नम्बर 04627-04628 ते 04629-04630 त्रै ते चार फरवरी गी कटरा ते श्रीनगर बश्कार चलगंन। एह रेलगड्डियां अपने सफर दौरान बनिहाल च रुकगंन। इस पैहल दा मकसद फसे दे यात्रियें दी मदद करना ते नियमित परिवहन सेवाएं च विघ्न पौने दे चलदे आरक्षित ते सुविधाजनक यात्रा गी यकीनी बनाना ऐ।



Satish Sports

खेड्द मंत्री सतीश शर्मा होरें जम्मू-कश्मीर च खेड्द ढांचे गी होर मजबूत करने प्रति सरकार दी वचनबद्धता फही दोहराई ऐ। एह गल्ल उनें कल जम्मू दे त्रिकूटा नगर स्थित खुली शतरंज प्रतियोगिता दी शुरुआत करोआंदे होई आक्खी। मंत्री होरें आयोजकें दे इस जत्न आस्तै सराहना कीती। उनें आखेया जे एह खेड्द बच्चें दे समझने दी शक्ति गी बदांदी ऐ ते अनुशासन सखांदी ऐ। उनें आखेया जे इनें आयोजनं कन्नै बच्चें च बुनियादी स्तह पर गै खेड्डें प्रति रुचि पैदा हुंदी ऐ ते उन्दे हुनर गी निखार थोन्दा ऐ। सतीश शर्मा होरें खेड्द ढांचे गी बेहतर बनाने ते खडारियें गी समर्थन देने प्रति सरकार दे जत्नं गी उजागर कीता। इस आयोजन गी लेइयै- लोकें च खास उत्साह दिक्खेया गया ऐ।



## Earthquake

बारामुला जिले च अज्ज बड्डलै 4 इशारिया 6 तीव्रता आहले भूचाल दे झटके महसूस कीते गो। अधिकारियें मूजब एह झटके बड्डलै 5 बज्जियै 35 मिन्ट पर आए। पट्टन एहदा मुख् केन्द्र हा। इस भूचाल करी अजें तगर कुसै चाली दे जानो-माल दे नुक्सान दी कोई खबर नैई ऐ।



## SARAS Mela

जम्मू दे कला केन्द्र च इसलै “सरस” मेला चला रदा ऐ। आकाशवाणी समाचार कन्नै गल्ल करदे होई जम्मू-कश्मीर ग्रामीण आजीविका मिशन दियां निदेशक डाक्टर Shubra शर्मा होरें आखेया जे एह मेला 31 जनवरी गी शुरु होआ हा ते एह 9 फरवरी तगर जारी रौहग। इसदा मकसद महिला सशक्तिकरण ते आजीविका दे मौकें गी बढ़ाना देना ऐ। उनें आखेया जे खास तवज्जो आप सहायता समूहें दी शमूलियत पर दिती गई ऐ। डाक्टर शर्मा होरें आखेया जे एह मेला ग्रामीण महिलायें च आत्म-विश्वास पैदा करदा ऐ। उनें आखेया जे नेह आयोजन जिले ते ब्लाक स्तहें पर बी कीते जागंन।



## DIC Ramban

रामबन जिले च जिला उद्योग केन्द्र आसेया मकामी औद्योगिक विकास- उद्यमशीलता ते स्वरोजगार गी बढ़ावा देने लेई लगातार कम्म कीता जा रदा ऐ। उद्योग ते बपार मैहकमे आसेया कैई बक्ख-बक्ख स्कीमां जियां जे प्रधानमंत्री रोजगार सृजन कार्यक्रम ते पी.एम

विश्वकर्मा गी लागू करने पर ध्यान केन्द्रित कीता जा रदा ऐ- तां जे नौजवानें गी रोजगार प्रदान करने आला- बनने लेई मदाद हासल होई सकै। इनें जतनें दा मुख मकसद जिले च औद्योगिक क्षेत्र गी बढ़ावा देना ऐ। इस्सै सिलसिले च डी.आई.सी. रामबन- नौजवानें गी सरकार प्रायोजित स्कीमें दा फायदा ठोआने आस्तै प्रोत्साहित करियै बेरोजगारी घट्ट करने लेई सक्रियता कन्नै कम्म करा रदा ऐ।

<><><><><><>